

JAMHURI YA MUUNGANO WA TANZANIA



BUNGE LA TANZANIA

KAMATI YA KUDUMU YA BUNGE YA UTAWALA, KATIBA NA SHERIA

**MAONI NA USHAURI WA KAMATI YA KUDUMU YA
BUNGE YA UTAWALA, KATIBA NA SHERIA KUHUSU
MUSWADA WA SHERIA YA MAREKEBISHO YA SHERIA
MBALIMBALI NA. 4 WA MWAKA 2023 [THE WRITTEN
LAWS (MISCELLANEOUS AMENDMENTS) (NO.4) BILL,
2023]**

[Imetolewa chini ya Kanuni ya 99(5)]

31 OKTOBA, 2023

YALIYOMO

Ukurasa

1.0	UTANGULIZI	2
1.1	Maelezo ya Awali na Hadidu za Rejea	2
1.2	Namna Kamati ilivyotekeleza Jukumu la Uchambuzi wa Muswada.....	3
2.0	UCHAMBUZI WA MUSWADA	5
2.1	Utangulizi	5
2.2	Sheria Zinazofanyiwa Marekebisho na Maudhui yake	6
3.0	MAONI NA USHAURI WA KAMATI.....	11
3.1	Maelezo ya Utangulizi	11
3.2	Marekebisho ya Sheria ya Leseni za Biashara, Na. 25 ya Mwaka 1972; (The Business Licensing Act, NO. 25 of 1972).....	11
3.3	Marekebisho ya Sheria ya Chuo cha Kumbukumbu ya Mwalimu Nyerere, Sura ya 93; (<i>The Mwalimu Nyerere Memorial Academy Act [CAP. 93]</i>).	12
3.4	Marekebisho ya Sheria ya Mafao ya Kustaafu katika Utumishi wa Kiasia, Sura ya 225; (<i>The Political Service Retirement Benefits Act, [CAP. 255]</i>).	12
3.5	Marekebisho ya Sheria ya Vipimo, Sura ya 340. (<i>The Weights and Measures Act, [CAP. 340]</i>).	13
4.0	HITIMISHO	15
4.1	Shukrani	15
4.2	Msimamo wa Kamati Kuhusu Hoja	16

**MAONI NA USHAURI WA KAMATI YA KUDUMU YA BUNGE YA
UTAWALA, KATIBA NA SHERIA KUHUSU MUSWADA WA SHERIA YA
MAREKEBISHO YA SHERIA MBALIMBALI NA. 4 WA MWAKA 2023 [THE
WRITTEN LAWS (MISCELLANEOUS AMENDMENTS) (NO.4) BILL, 2023]**

1.0 UTANGULIZI

1.1 Maelezo ya Awali na Hadidu za Rejea

Mheshimiwa Spika, kwa mujibu wa Kanuni ya 99 (5) ya Kanuni za Kudumu za Bunge, Toleo la Februari, 2023, naomba kuwasilisha Maoni ya Kamati ya Kudumu ya Bunge ya Utawala, Katiba na Sheria kuhusu Muswada wa Sheria ya Marekebisho ya Sheria Mbalimbali Na. 4 wa Mwaka 2023 (*The Written Laws (Miscellaneous Amendments) (No.4) Bill, 2023*).

Mheshimiwa Spika, kwa kuzingatia masharti ya Kanuni ya 93 (2) ya Kanuni za Kudumu za Bunge, Muswada huu ulisomwa Bungeni kwa mara ya kwanza katika Mkutano wa kumi na mbili, kikao cha tisa kwenye Bunge la 12, tarehe 8 Septemba, 2023.

Mheshimiwa Spika, kwa mujibu wa Kanuni ya 97 (1) ikisomwa pamoja na Kanuni ya 136 (14) na Kifungu cha 7(1) (b) cha Nyongeza ya Nane ya Kanuni za Kudumu za Bunge, uliuelekeza Muswada huu kwenye Kamati ya Kudumu ya Bunge ya Utawala, Katiba na Sheria ili ufanyiwe uchambuzi na kujadiliwa kwa kina. Naomba kulijulisha Bunge lako tukufu kwamba, Kamati imeuchambua na kuujadili Muswada huu kwa kuzingatia,

Katiba, Sheria mbalimbali pamoja na Kanuni za Kudumu za Bunge.

1.2 Namna Kamati ilivyotekeleza Jukumu la Uchambuzi wa Muswada

Mheshimiwa Spika, katika kutekeleza jukumu hilo, Kamati ilikutana na Serikali tarehe 18 Oktoba, 2023 ili kupokea maelezo ya Mhe. Jaji Eliezer Mbuki Feleshi (Mb) Mwanasheria Mkuu wa Serikali kuhusu maudhui ya Muswada huu. Baada ya Kamati kupatiwa maelezo ya Serikali, Wajumbe walipata fursa ya kuuliza maswali, na kupata maelezo ya ufafanuzi katika ibara mbalimbali za Muswada.

Mheshimiwa Spika, kwa kuzingatia Kanuni ya 97(2) ya Kanuni za Kudumu za Bunge Kamati ilifanya Mkutano wa Kusikiliza Maoni ya Wadau (*Public Hearing*) tarehe 19 Oktoba, 2023 ili kupokea maoni yao kuhusu Muswada huu. Aidha, Kamati ilipokea maoni kwa njia ya mtandao kutoka kwa watu na makundi mbalimbali ya wadau ambao hawakuweza kufika mbele ya Kamati kuwasilisha maoni yao.

Mheshimiwa Spika, nawashukuru wadau wote waliotoa maoni yao ili kuuboresha Muswada huu na nichukue fursa hii kuwatambua kama ifuatavyo: -

1. Chama cha Wanasheria Tanganyika (TLS);
2. Kituo cha Sheria na Haki za Binadamu (LHRC);
pamoja na
3. Wadau binafsi kutoka maeneo mbalimbali nchini.

Mheshimiwa Spika, baada ya hatua hiyo, Wajumbe wa Kamati walipata fursa tena ya kujadili maudhui ya Muswada kwa kuzingatia maelezo ya Mwanasheria Mkuu wa Serikali na kwa kuzingatia maoni ya wadau. Mnamo tarehe 23 Oktoba, 2023 Kamati ilikutana tena na Mwanasheria Mkuu wa Serikali ambaye alijibu hoja mbalimbali zilizoibuliwa na Wajumbe wa Kamati kuhusu ibara mbalimbali za Muswada.

Mheshimiwa Spika, baada ya hatua hiyo, nilizingatia masharti ya Kanuni ya 98 (1) ya Kanuni za Kudumu za Bunge na kukujulisha rasmi kwamba Kamati imekamilisha uchambuzi wa Muswada ili ujadiliwe Bungeni.

2.0 UCHAMBUZI WA MUSWADA

2.1 Utangulizi

Mheshimiwa Spika, kamati ilichambua Muswada wa Sheria ya Marekebisho ya Sheria Mbalimbali Na.4 wa Mwaka 2023 [*The Written Laws (Miscellaneous Amendments) (No.4) Bill, 2023*] ukiwa umegawanyika katika sehemu kumi na moja (11) na unapendekeza kufanya marekebisho katika sheria kumi (10) kwa madhumuni ya kuondoa mapungufu au kutatua changamoto ambazo zimejitokeza katika utekelezaji wa Sheria hizo. Sheria zinazopendekezwa kufanyiwa marekebisho ni zifuatazo: -

- (a) Sheria ya Leseni za Biashara, Na. 25 ya Mwaka 1972; (*The Business Licensing Act, Act No. 25 of 1972*)
- (b) Sheria ya Taasisi ya Teknolojia ya Dar es Salaam, Sura ya 144; (*The Dar es Salaam Institute of Technology Act [CAP.144]*)
- (c) Sheria ya Stahili na Mafao ya Majaji, Sura ya 424; (*The Judges (Remuneration and Terminal Benefits) Act, [CAP. 424]*)
- (d) Sheria ya Chuo cha Kumbukumbu ya Mwalimu Nyerere, Sura ya 93; (*The Mwalimu Nyerere Memorial Academy Act [CAP. 93]*)
- (e) Sheria ya Mafao ya Kustaafu katika Utumishi wa Kisiasa, Sura ya 225; (*The Political Service Retirement Benefits Act, [CAP. 255]*)

- (f) Sheria ya Utumishi wa Umma, Sura ya 298; (*The Public Service Act*, [CAP. 298])
- (g) Sheria ya Shirika la Maendeleo ya Viwanda Vidogo, Sura ya 112; (*The Small Industries Development Organisation Act*, [CAP. 112])
- (h) Sheria ya Mamlaka ya Maendeleo ya Biashara, Sura ya 155; (*The Tanzania Trade Development Authority Act*, [CAP. 155])
- (i) Sheria ya Usajili wa Wataalamu wa Mipango Miji, Sura ya 426; (*The Towns Planners (Registration) Act*, [CAP. 426]) na
- (j) Sheria ya Vipimo, Sura ya 340. (*The Weights and Measures Act*, [CAP. 340])

Mheshimiwa Spika, Sehemu ya Kwanza ya Muswada inayohusu masharti ya utangulizi, inajumuisha **Ibara ya 1** inayohusu jina fupi na **Ibara ya 2** inayoeleza marekebisho yanayofanyika katika sheria mbalimbali.

2.2 Sheria Zinazofanyiwa Marekebisho na Maudhui yake

Mheshimiwa Spika, Wakati tunafanya uchambuzi wa Muswada huu Pamoja na Maelezo ya Mwanasheria Mkuu wa Serikali, Kamati ilibaini changamoto au mapungufu katika sheria Nne kati ya sheria kumi zinazopendekezwa kufanyiwa marekebisho kama zilivyo wasilishwa na mtoa hoja.

Mheshimiwa Spika, Sehemu ya Pili ya Muswada inapendekeza marekebisho ya **Sheria ya Leseni za**

Biashara, Na. 25 ya Mwaka 1972; (*The Business Licensing Act, NO. 25 of 1972*). Marekebisho hayo yanafafanuliwa katika Ibara ya 3 hadi Ibara ya 11 ya Muswada. Marekebisho katika sehemu hii kwa ujumla yanalenga kuongeza tafsiri ya misamiati ambayo awali haikuwa imefafanuliwa, kuhariri masharti ya ukomo wa leseni na kuweka utaratibu wa kufuta au kusitisha leseni ya biashara. Pia, marekebisho haya yanahusisha kuongeza majukumu ya mamlaka ya utoaji leseni wakati wa ukaguzi na kuongeza adhabu kwa makosa yaliyoainishwa katika sheria hiyo. Marekebisho haya pia yanaweka masharti kwa mmiliki wa leseni ya biashara kuwasilisha taarifa kwa mamlaka husika ikiwa atapanga kusitisha au kuacha kufanya biashara, kubadili aina ya biashara au kubadili mahali pa biashara.

Mheshimiwa Spika, Sehemu ya Tano ya Muswada inapendekeza kufanya marekebisho ya **Sheria ya Chuo cha Kumbukumbu ya Mwalimu Nyerere, Sura ya 93; (*The Mwalimu Nyerere Memorial Academy Act [CAP. 93]*).**

Sehemu hii inahusu ibara ya 29 hadi 41 ambapo Marekebisho yanayopendekezwa katika Sheria hii ni kuboresha na kurekebisha sheria ili kuendana na miongozo ya NACTVET (Baraza la Taifa la Mafunzo ya Ufundi na Ufundi Stadi), ambayo ni mamlaka ya usimamizi na udhibiti wa elimu na mafunzo ya ufundi nchini.

Mheshimiwa Spika, Ibara ya 32 ya Muswada inapendekeza kuweka jina la jumla la mamlaka ya

usimamizi badala ya jina kamili la NACTVET, hii inalenga kuondoa ulazima wa kurekebisha Sheria kila yanapotokea mabadiliko ya jina la mamlaka hiyo.

Mheshimiwa Spika, Marekebisho mengine katika sehemu hii yanalenga kuboresha uongozi na utawala katika Chuo cha Kumbukumbu ya Mwalimu Nyerere. Baadhi ya marekebisho yanahusisha kubadili majina ya vyeo vya Mkuu wa Chuo na wasaidizi wake ili kuendana na miongozo ya NACTVET. Pia, marekebisho hayo yanahusu kuongeza na kuboresha tafsiri ya misamiati mbalimbali ili kutoa ufafanuzi wa misamiati iliyotumika kwenye Sheria lakini haijatafsiriwa.

Mheshimiwa Spika, Sehemu ya Sita inapendekeza kufanya marekebisho ya **Sheria ya Mafao ya Kustaafu katika Utumishi wa Kisiasa, Sura ya 225; (The Political Service Retirement Benefits Act, [CAP. 255])**. Kamati ilielezwa kuwa Marekebisho kwa ujumla yanalenga mambo yafuatayo: -

- a) Kuongezwa kwa vifungu vipya vya 9A, 12A, na 14A ili kuwawezesha wenza wa Rais Mstaafu, Makamu wa Rais Mstaafu, na Waziri Mkuu Mstaafu kulipwa kiinua mgongo wakati wa kipindi cha uongozi wa wenza wao.
- b) Kufanya marekebisho katika vifungu vya 11, 13, na 15 ili kuweka utaratibu wa malipo ya pensheni kwa wategemezi wa Rais Mstaafu, Makamu wa Rais Mstaafu, na Waziri Mkuu Mstaafu endapo watafariki

wakiwa madarakani au baada ya kumaliza muda wao na kufariki kabla ya kulipwa mafao au stahiki zao.

- c) Kurekebisha kifungu cha 14 ili kuwawezesha Mawaziri Wakuu wastaafu ambao walistaafu kabla ya kuanza kutumika kwa Sheria ya Mafao ya Kustaafu katika Utumishi wa Kisiasa ya mwaka 1999 kuwa na wasaidizi (makatibu) kwa ajili ya kuwasaidia katika kazi zao.
- d) Kurekebisha kifungu cha 18 ili kuweka utaratibu wa mwenza wa Spika Mstaafu aliyefariki kupokea mafao ya pensheni ya kila mwezi.
- e) Kufanya marekebisho katika Jedwali la Sheria ili kuboresha stahiki za Viongozi Wakuu wa kisiasa pamoja na wenza wao ama familia ya karibu.

Mheshimiwa Spika, Sehemu ya Kumi na Moja ya Muswada inapendekeza marekebisho ya **Sheria ya Vipimo, Sura ya 340. (The Weights and Measures Act, [CAP. 340])**. Marekebisho hayo yanafafanuliwa katika Ibara ya 77 hadi Ibara ya 98 ya Muswada. Kamati ilielezwa kuwa Marekebisho kwa ujumla yanalenga Kurekebisha makosa ya kiuandishi pamoja na kutoa tafsiri sahihi ya maneno yaliyotumika ili kuleta maana iliyokusudiwa na Kuongeza ufanisi katika utekelezaji wa majukumu ya Wakala wa Vipimo kwa kuhamishia majukumu ya kiutendaji kwa Kamishna wa Vipimo badala ya Waziri. Marekebisho haya

yanatarajiwa kuongeza ufanisi na kuboresha utekelezaji wa majukumu ya wakala.

Mheshimiwa Spika, Muswada huu unapendekeza kuwaongezea uwezo Mamlaka ya Vipimo ya kukamata bidhaa ambazo hazijakidhi vigezo vya kisheria ikiwa ni pamoja na kufunga eneo ambalo mkaguzi / Afisa Vipimo anaamini limetumika kutenda kosa chini ya Sheria hii. Aidha, Ibara ya 97 inafuta kifungu cha 49 na kukiandika upya ili kutambua uthibitisho wa mkaguzi / Afisa Vipimo wa maandishi kuhusu uzito wa bidhaa au bidhaa yenyewe na kuwa utapokelewa Mahakamani kama ushahidi bila uthibitisho (*Judicial Notice*). Vilevile, Ibara hiyo inafuta na kukiandika upya kifungu cha 50 ili kutoa nafasi kwa mmiliki wa vifaa vya kupimia au bidhaa zilizozuiliwa kujieleza na akishindwa kufanya hivyo ndipo vitataifishwa na hatimaye kuondoshwa kadiri ya amri ya Mahakama. Lengo ni kuondoa mapungufu yaliyobainika wakati wa utekelezaji na kuongeza ufanisi katika utendaji.

3.0 MAONI NA USHAURI WA KAMATI

3.1 Maelezo ya Utangulizi

Mheshimiwa Spika, kwa sehemu kubwa Kamati imekubaliana na mapendekezo ya Muswada yaliyowasilishwa na Mwanasheria Mkuu wa Serikali isipokuwa kwa baadhi ya maeneo ambayo Wajumbe wa Kamati walitoa maoni, mapendekezo na kufanya marekebisho ya msingi ili kuuboresha Muswada huu kama inavyofafanuliwa katika aya zinazofuata.

3.2 Marekebisho ya Sheria ya Leseni za Biashara, Na. 25 ya Mwaka 1972; (The Business Licensing Act, NO. 25 of 1972).

Mheshimiwa Spika, Katika Ibara ya 8 Kamati ilipendekeza kuwaondoa Askari Polisi kwenye jukumu la moja kwa moja la kuingia kwenye biashara na kufanya ukaguzi wa leseni bila ya kutokuwa na sharti la kuambatana na Afisa Biashara. Aidha, Kamati ilishauri kuwa Sheria isiweke ulazima kwa Maafisa Biashara kuambatana na Polisi kwenye ukaguzi isipokuwa kama wataona kuna umuhimu wa kuambatana nao.

Mheshimiwa Spika, Serikali ilikubaliana na ushauri wa Kamati na wamefanya mabadiliko Kwa kuzingatia ushauri wa Kamati. Aidha, Kamati inaipongeza Serikali kwa kufuata ushauri wa Kamati kwa kuwaondoa Askari Polisi kwenye jukumu la moja kwa moja la ukaguzi wa leseni za biashara na kuambatana na Maafisa Biashara pale watakapo hitajika.

3.3 Marekebisho ya Sheria ya Chuo cha Kumbukumbu ya Mwalimu Nyerere, Sura ya 93; (*The Mwalimu Nyerere Memorial Academy Act [CAP. 93]*).

Mheshimiwa Spika, Ibara 37 inaunda Kamati ya Taaluma inayoshughulikia udhibiti na uhakiki wa ubora wa taaluma kwenye Chuo hiki. Aidha, Ibara hiyo imeainisha wajumbe walioko kwenye Kamati hiyo, Kamati ilifanya majadiliano ya kina na Serikali kuhusu umuhimu wa kuwepo na uwakilishi wa Mwamini wa Wanafunzi (*Dean of Students*) pamoja na Wakuu wote wa vitivo na idara ya Chuo kwenye Kamati hiyo. Tunaipongeza Serikali kwa kukubali ushauri na kuleta marekebisho kwa kuongeza wajumbe kama ilivyoshauriwa na Kamati.

3.4 Marekebisho ya Sheria ya Mafao ya Kustaafu katika Utumishi wa Kisiasa, Sura ya 225; (*The Political Service Retirement Benefits Act, [CAP. 255]*).

Mheshimiwa Spika, Katika Ibara ya 43, 45, 46 na 48 Kamati ilipendekeza kutokutumia maneno kiinua mgongo (*Gratuity*) kwa kuwa maneno hayo kwa muktadha wa sheria hii yanatumika kuwalipa Watumishi wa Umma ambao ni Rais, Makamu wa Rais, Waziri Mkuu, Spika, Naibu wa Spika, Mawaziri, Manaibu Mawaziri, Wabunge, Wakuu wa Mikoa na Wakuu wa Wilaya. Aidha, Kamati iliishauri Serikali kutumia maneno malipo ya fadhila (*ex-gratia*) kuakisi lengo linalokusudiwa.

Mheshimiwa Spika, Ibara ya 51 inarekebishwa ili kuwaimarishia ulinzi Makamu wa Rais Mstaafu na Waziri Mkuu Mstaafu pamoja na familia zao za karibu. Hata

hivyo, maneno “familia ya Karibu” hayakupewa tafsiri rasmi kwenye sheria hii, na ili kutoleta tafsiri ambazo hazikukusudiwa na kutokana na ufafanuzi wa Serikali kuwa wanakusudia kuimarisha ulinzi kwenye makazi ya Viongozi hao wastaafu, Kamati iliishauri Serikali kutumia neno “makazi” kama mbadala wa maneno “familia ya Karibu”.

Mheshimiwa Spika, Serikali ilikubaliana na ushauri wa Kamati na wamefanya mabadiliko Kwa kuzingatia ushauri uliotolewa na Kamati. Kamati inaipongeza Serikali kwa kufanya mabadiliko ya kufuata maneno “kiinua mgongo” na kuandika maneno “malipo ya fadhila” na kufuta maneno “familia ya karibu” na kuandika neno “makazi”.

3.5 Marekebisho ya Sheria ya Vipimo, Sura ya 340. (*The Weights and Measures Act, [CAP. 340]*).

Mheshimiwa Spika, Ibara ya 97 inarekebisha kifungu cha 50 cha sheria hii kwa kuweka utaratibu wa kutaifisha mali na kuziondoa baada ya mmiliki kushindwa kutokea kujieleza kuhusu dosari zilizobainika kwenye mali zake. Kifungu hakijaweka wazi mmiliki atatokea kujitetea wapi, kwa kukiacha kama kilivyo kunaweza kuzua sintofahamu na kupelekea mali kutaifishwa. Kwa kuwa Mahakama inajukumu la Kikatiba la kusimamia utoaji haki nchini, Kamati iliishauri Serikali kufafanua kuwa mmiliki huyo atafikishwa Mahakamani kwenda kujibu tuhuma hizo.

Mheshimiwa Spika, Tunaipongeza Serikali kwa kukubaliana na ushauri wa Kamati na wamefanya mabadiliko Kwa kuzingatia ushauri wa Kamati.

4.0 HITIMISHO

4.1 Shukrani

Mheshimiwa Spika, napenda kuchukua fursa hii kutoa shukrani zangu za dhati kwa Wajumbe wa Kamati kwa kuujadili na kuuchambua Muswada huu ili kuboresha maudhui yaliyomo katika marekebisho yanayopendekezwa. Kwa umuhimu wa mchango wao katika kushughulikia muswada huu, naomba niwatambue kama ifuatavyo: -

1. Mhe. Joseph Kizito Mhagama, Mb – **Mwenyekiti**
2. Mhe. Abdullah Ali Mwinyi, Mb - Mjumbe
3. Mhe. Rashid Abdallah Shangazi, Mb - Mjumbe
4. Mhe. Wanu Hafidh Ameir, Mb - Mjumbe
5. Mhe. Boniphace Nyangindu Butondo, Mb- Mjumbe
6. Mhe. Edward Olelekaita Kisau, Mb - Mjumbe
7. Mhe. Dkt. Alice Karungi Kaijage, Mb - Mjumbe
8. Mhe. Selemani Jumanne Zedi, Mb - Mjumbe
9. Mhe. Omar Issa Kombo, Mb - Mjumbe
10. Mhe. Salum Mohammed Shaafi, Mb - Mjumbe
11. Mhe. Ahmed Juma Ngwali, Mb - Mjumbe
12. Mhe. Agnesta Lambert Kaiza, Mb - Mjumbe
13. Mhe. Yahaya Omary Massare, Mb - Mjumbe
14. Mhe. Hussein Nassor Amar, Mb - Mjumbe
15. Mhe. Khadija Shaaban Taya, Mb - Mjumbe
16. Mhe. Jonas Van Zeeland, Mb - Mjumbe
17. Mhe. Abeid Ighondo Ramadhani, Mb - Mjumbe
18. Mhe. Mashimba Mashauri Ndaki, Mb - Mjumbe
19. Mhe. Seif Khamis Said Gulamali, Mb - Mjumbe

Mheshimiwa Spika, Napenda kuchukua nafasi hii kumshukuru Mhe. Balozi Dkt. Pindi Chana, (Mb) Waziri wa Katiba na Sheria, Mhe. Pauline Philipo Gekul (Mb) Naibu Waziri wa Wizara ya Katiba na Sheria, Mhe. Eliezer Mbuki Feleshi Mwanasheria Mkuu wa Serikali, Mwandishi Mkuu wa Sheria wa Serikali Ndg. Onorius Njole, pamoja na watendaji wote wa Serikali kwa ushirikiano wao wa dhati katika kuyafanyia kazi maoni na mapendekezo ya Kamati.

Mheshimiwa Spika, nawashukuru Watumishi wote wa Ofisi ya Bunge chini ya uongozi thabiti wa Katibu wa Bunge Ndg. Nenelewa J. Mwihambi, ndc na kwa upekee Sekretarieti ya Kamati kwa uratibu wa shughuli za Kamati hadi kukamilika kwa taarifa hii.

4.2 Msimamo wa Kamati Kuhusu Hoja

Mheshimiwa Spika, baada ya kusema hayo, Kamati inalishauri Bunge lako tukufu kuujadili, kuukubali na kuupitisha Muswada huu pamoja na Jedwali la Marekebisho kama lilivyowasilishwa na mtoa hoja.

Mheshimiwa Spika, naomba kuwasilisha na naunga mkono hoja.



Mhe. Florent Laurent Kyombo (Mb)

**M/MWENYEKITI WA KAMATI YA KUDUMU YA
BUNGE YA UTAWALA, KATIBA NA SHERIA**

31 Oktoba, 2023